



17. august 2022

UKA2022/59

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Nunap immikkoortuini Uummannami Upernavimmilu najugaqartunik piniarnermut nakkutilliisoqalernissaa sulissuteqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Jens Kristian Therkelsen, Siumut)

Tungavilersuut

Uummannap Upernaviullu eqqaat isorartoorujussuuvoq inoqarfittullu siammarsimallutik inissisimapput. Ilutigisaanik piniarneq aalisarnerlu sumiiffimmi inuussutissarsiutit pingaarnersaattut inissisimalluni ukioq naallugu inuussutissarsiutaasarpoq ilaqutariippassuarnullu napassutaalluni.

Nalunngilarput sinerissap qanittuani aalisarnek eqqarsaatigalugu piffinni qaleralinnut qassusersorfiup nalaani, pingaartumik killeqarfiit eqqarsaatigalugit nakkutilliinerunissamik atuisut kissaateqartuartartut. Tassami maannakkut kujasinnerusumiit nakkutilliisut annerusumik avannarpartertarnerat piuneq ajormat.

Aalisakkat qaqqinneqartartut annertoorujussuummata, aamma aalisarfiit nakkutiginnissaat pisariaqartuartarmat pinngitsoorneqarsinnaangitsutut ippoq nakkutilliisoqarnissaq.

Taamattaaq piniakkat eqqarsaatigalugit ippoq, Uummannap eqqaa Nuussuaq tuttoqarfiuvoq, Siguup nunataa umimmaqarfiulluni, taakkulu aamma piniagaaffiini nakkutilliisoqarnissaa pisariaqartartoq ilisimaneqarpoq.

Piniakkat imarmiut killilersukkat eqqarsaatigalugit pingaartumik qilalukkat piniarluarneqartarput, aamma killilersukkat allat soorlu tikaagulliit, nannut, aarrit il. il. piniarneqartarlutik.

Ataatsimut isigalugu piffik annertoq piniagassarpassualik, aalisagaqarfissuarlu, atuisunit kissaatigineqartarmat taamatut pilersitsigutta iluaqutaassasoq ilimanarluinnarpoq.

Neriullunga Inatsisartut sineriassuatsinni aalisarnermut piniarnermullu nakkutilliisoqarneq pillugu tungaviusumik oqallilluassasut, apeqqut Inatsisartunut oqaluuserisassanngortippara.



Pisortanut aningaasatigut allaffissornikkullu kingunissai

Aalisarnermut piniarnermullu nakkutilliisut ataatsimik amerlineqarnerat ukiumoortumik 1 mio. kr.-inik aningaasartuuteqarnerulermik kinguneqassasoq Naalakkersuisut §37 tunngavigalugu apeqquaqartoqarneranut akissuteqarnerminni aggustimi 2019-imi¹ ilisimatitsissutigaa. Taassuma saniatigut angallatigut, ilinniartitseqqiinernut, allaffimmik attartornermut, elektronikkikkut atortorissaarutininik pisiniarnermut atisassaqaarnissaannut allatigullu aningaasartuutinut 2 mio. kr. tikillugit ukiumut aningaasartuuteqartoqarsinnaalluni. Piniarnermut nakkutilliisut marluk atorfinitsinneqassappata ukiumut aningaasartuutit 6 mio. kr. missaannik akeqarnissaat ilimanarpoq.

Angallammut atugassamut tunngatilluguttaaq naalakkersuisut ilisimatitsissutiginikuaat Tasiilap eqqaanut tulluuttuuppat, 750.000 kr. missaanik akeqartussaassasoq, ukiumullu ingerlanneqarneranut 150.000 kr. missaanik akeqassalluni.

Naatsorsuinerit qulaani eqqaaneqartut tunngavigalugit naatsersuutigaarput Uummannami Upernavimmilu taamatukanneq aningaasartuuteqartoqarumaartoq.

Namminersorlutik inuussutissarsiuteqartunut aningaasatigut allaffissornikkullu kingunissai

Soqanngilaq.

Innuttaasunut aningaasatigut allaffissornikkullu kingunissai

Soqanngilaq.